

龍思鶴

雙清白齋遺稿

之

在清集

龍夢凝謹按遺稿照片謄錄

初次製作日期：公元二零二二年五月二日

更新日期：公元二零二五年五月一日

更新號數：貳

原載網站：www.lshpoetry.net

請參閱由網站提供之簡介及其他若干集遺稿照片與謄本。

A Posthumous Collection of the Manuscripts of 龍思鶴
Transcript of the Manuscript 在清集 (*Zài Qīng Jí*)

Transcribed by: Lung, Mon Yin, B.A., MSS, MSLS, Sp.Cert., JD

Date of First Issue: 2022-05-02

Date of Revision: 2025-05-01

Revision Number: Two

To read the website introduction and view photos of the complete collection of manuscripts, please visit:

www.lshpoetry.net

龍思鶴遺詩謄錄體例

龍夢凝

先祖思鶴公，吾粵著名書法家及詩人也。雖生當亂世，猶練字不絕，以詩為日記，言志達意之餘，對民國時期軍政亦頗有記錄。為方便閱讀及在線追查，夢凝不自量力，謹將先祖詩稿謄錄及電子化，以供世人參攷。惟夢凝學淺識陋，且又去國逾半世紀，謬誤舛錯難免，實愧對先祖矣！以下為三思及實驗後所定之謄錄體例，敬請讀者留意：

- 一．凡先祖對詩稿有所修改者，一概依最後定稿抄錄。
- 二．為保持文氣流暢，所有印鑑及圈點均畧過。
- 三．先祖為書法家，詩稿常用異體字，或增減筆劃，或變換部首。為保持原稿本來面目，夢凝已盡力於網路上搜尋相同字形，有力所不逮或置疑者，以紅色字誌之；有因不能解讀故不謄錄者，以紅色□誌之；又如所寫者為行書或草書而乏相同字形者，則以傳統繁體字代之；敬請識者教正。此外先祖慣於并用繁簡正異各式字體，讀者在線追查時務請兼顧。
- 四．如第三點所言，先祖時用異體字，為方便讀者計，特製異體字與傳統繁體字對照表以供參攷，此後亦會不時補充，為免過長，表內不含常用簡體字：

三至六劃										
異體	亾	𠂇	𠂇	尔	𠂇	𠂇	𠂇	𠂇	帆	壯
繁體	亡	凡	功	爾	異	定	來	回	帆	壯

七劃(1)								
異體	𠂇	𠂇	𠂇	𠂇	𠂇	𠂇	𠂇	𠂇
繁體	忘	來	芒	宜	弄	叔	或	或

七劃(2)							
異體	𠂇	𠂇	𠂇	𠂇	𠂇	𠂇	𠂇
繁體	於	狀	菽	吳	走	兩	兒

八劃								
異體	徃	卒	汰	岍	哉	叅	𣎵	刼
繁體	往	卒	法	岸	哉	參	焚	劫, 刼

九劃										
異體	玼	𣎵	將	𣎵	竒	京	陵	侯	旆	流
繁體	珍	夜	將	從	奇	京	陵	侯	旆	流

十劃(1)										
異體	柳	淋	寂	密	從	陵	亭	美	曹	惠
繁體	柳	淑	寂	密	從	陵	亭	美	曹	惠
十劃(2)										
異體	冤	𣎵, 𣎵		愛	啓	船	𣎵	恥	𣎵	
繁體	冤	最		愛	啟	船	創	耻	職	

十一劃(1)										
異體	捻	逋	虐	倚	茫	迴	遊	盖	崕	第
繁體	總	邊	虐	倚	茫	迴	遊	蓋	崖	第
十一劃(2)										
異體	𣎵	啓	處	窓	夢	高	墮	眾	節	筆
繁體	能	啟	處	窗	夢	高	墮	衆	節	筆

十二劃(1)										
異體	𣎵	復	趁	殷	幾	晉	寔	麻	楚	涼
繁體	厭	復	趁	殷	幾	晉	實	曆	楚	涼
十二劃(2)										
異體	邊	廌	經	隨	兼	發	替	爲	鄉	雙
繁體	邊	寓	經	隨	兼	發	督	為	鄉	雙

十三劃									
異體	遷	𣎵	衰	匯	鳳	隱	臺	蔣	鼻
繁體	遷	禍	裝	滙	鳳	隱	臺	蔣	曼

十四劃										
異體	話	樹	廠	寫	夢	綫	慨	圖	靜	狸
繁體	話	樹	廠	寫	夢	總	慨	圖	靜	狸

十五劃												
異體	聯	潛	壑	總	戲	潛	緣	駟	鉞	僕	篇	噐
繁體	聯	潛	壓	總	戲	潛	緣	驅	鉞	僕	篇	噐

十六劃								
異體	穩	漫	慢	錄	縱	劍	墻	懷
繁體	穩	漫	慢	錄	縱	劍	牆	懷

十七至廿三劃								
異體	邊	霸	募	鶯	墻	聽	鸞	華
繁體	邊	靈	蔓	鵝	牆	聽	燕	華

詩目

(謄錄後附加)

照片檔案編號*

- | | |
|--|-----------------|
| 1. 夜宿曲江船与胡章民蕭越生夜酌感事 | dsc_8467 |
| 2. 訪風度樓舊址 | dsc_8467 & 8469 |
| 3. 訪軍中諸友 | dsc_8469 |
| 4. 偕許齡筠訪公武私邸 | dsc_8469 |
| 5. 許將軍自滬返部選廣州辦公常得省視老母稍盡子職 | dsc_8469 & 8471 |
| 6. 林公任自汕末薦任軍部書記 | dsc_8471 |
| 7. 贈吳枚臣 | dsc_8471 |
| 8. 謝盧大令家駒惠贈翁源石鷹 | dsc_8471 & 8473 |
| 9. 世變 | dsc_8473 |
| 10. 重見王榮庭 | dsc_8473 & 8475 |
| 11. 林毅強自雲南返羊石以普洱茶爨寶子碑拓本見貽賦謝 | dsc_8475 |
| 12. 感暮 | dsc_8475 & 8477 |
| 13. 女冠子 | dsc_8477 & 8480 |
| 14. 偕越生章民飲陸羽居 | dsc_8480 |
| 15. 張星羽辭旅長職銜許將軍命往慰留時方有事粵西張復請事完後乞罷免 | dsc_8480 |
| 16. 題許佛航蕭越生与余合照像 | dsc_8480 |
| 17. 殘臘還鄉 | dsc_8481 |
| 18. 辛酉元旦 | dsc_8481 |
| 19. 東園追悼陣亡將士感挽 | dsc_8481 & 8483 |
| 20. 梅瑩赴花埭貧民教養院參觀余因事後至歸舟感賦 | dsc_8483 |
| 21. 幕府 | dsc_8483 & 8485 |
| 22. 与梅瑩夜泛東流聽笙歌聲滿東堤上下相與感歎 | dsc_8485 |
| 23. 懷伍少裴 | dsc_8485 |
| 24. 珠江重晤陳去病共酌南園 | dsc_8485 & 8487 |
| 25. 遊北園擬劉楨雜詩一首為梅瑩進酒 | dsc_8487 |
| 26. 馮軼裴南歸喜余軍幕尤深切磋商之契 | dsc_8487 |
| 27. 赴港視許將軍疾乘火車歸途漫作 | dsc_8487 & 8490 |
| 28. 赴港報告部務許將軍以清遠縣知事馬某不洽輿情擬辟余承乏且曰已電李君子寬未接管秘書處事務余婉謝之時軍部各處文案多集中秘書室北伐大計已定不願遽離也賦此自解 | dsc_8490 |
| 29. 星期日携梅瑩遊黃花岡 | dsc_8490 & 8492 |
| 30. 為吳木蘭女士書扇面即呈葉大 | dsc_8492 |
| 31. 鄧仲元先生為語我以委知清遠縣事赴港復於許將軍前極陳吏治整飭尚非其時且無積資謬贗縣寄更非所宜為言許將軍謂暫無適當人接篆子寬即到可即赴任余辭不獲乃返省部署親知紛末慰問平空又增方寸俶擾賦此三首以明志 | dsc_8492 & 8494 |
| 32. 辛酉春社与諸父老鄉飲 | dsc_8494 |
| 33. 李勵瑩陳筱雅李伯璋李榦宸葉筱花劉達衡諸友同赴任車抵潯江乘船至清遠縣城過飛來峽賦詩示從者 | dsc_8494 & 8496 |
| 34. 王榮庭羅約經未遊 | dsc_8496 |
| 35. 清明日植樹飛來峰 | dsc_8496 & 8497 |
| 36. 濱江城鬪和息紳民餽送頌言書錦箋八幅紀此案始末余受之意有未釋賦以自訟 | Dsc_8497 & 8499 |

詩目（續）

（謄錄後附加）

照片檔案編號*

- | | |
|--|-----------------|
| 37. 巡視太平市山塘紀事 | dsc_8499 |
| 38. 尊學 | dsc_8499 & 8502 |
| 39. 除害 | dsc_8502 |
| 40. 國會非常會議議決中華民國政府組織大綱舉 中山先生為大總統
五月五日就職電呈敬賀奉 賜電勗以「盼我同志共任艱難」 拜讀
之餘弥深感勉賦詩一首 | dsc_8502 & 8504 |
| 41. 梅瑩遠未視余戲作 | dsc_8504 |
| 42. 署園白玉蘭高蔭參天大風摧倒梅瑩坐玉蘭樹攝影 | dsc_8504 |
| 43. 鄉人將母命末問訊 | dsc_8504 & 8505 |
| 44. 偕梅瑩遊太和洞 | dsc_8505 & 8507 |
| 45. 援桂之役我軍克梧州陽山匪蠢動圖為沈鴻英內應鄧仲元師長派參
謀長陳可鈺到縣商翻防務余已檄調民團佈防濱江得關國雄張國楨
兩旅長舖門捷報第一師所部進駐連江口一帶陽江匪黨被擊散夜巡
返署燈下感賦 | dsc_8507 |
| 46. 王棨庭出宰賀縣遣賢阮傑榮末告詩以寄贈 | dsc_8507 & 8511 |
| 47. 登峽山寺示梅瑩 | Dsc_8511 |
| 48. 夜泛酒船與梅瑩觀月 | dsc_8511 |
| 49. 藏霞洞 | dsc_8511 |
| 50. 梅瑩未遊數日即去 | dsc_8513 |
| 51. 馬君武出長桂政函聘省署諮議述懷 | dsc_8513 |
| 52. 署園靜坐 | dsc_8513 & 8516 |
| 53. 重陽望葦架山 | dsc_8516 |
| 54. 求治 | dsc_8516 |
| 55. 應關伍兩法官酒船招飲 | dsc_8516 & 8521 |
| 56. 送葉少花入桂并托致書星羽章民越生諸同志 | dsc_8521 |
| 57. 寄懷蕭越生蒼梧 | dsc_8521 |
| 58. 胡章民自梧州軍次回云將遠行同遊先施天台留一夕談即事 | dsc_8521 & 8522 |
| 59. 聞伍少裴在桂以嫌疑被繫往繆澤邨古湘勤處訪問消息庸中陡生根
觸數奇如伍子者曷勝浩歎 | dsc_8522 |
| 60. 與客小飲官齋聞捷 | dsc_8522 & 8524 |
| 61. 平民圖書館成立贈館長黃伯言 | dsc_8524 |
| 62. 警政 | dsc_8524 & 8527 |
| 63. 各界歡送會感賦別邑民 | dsc_8527 |
| 64. 赴邑紳餞別酒船 | dsc_8527 & 8529 |
| 65. 歸船過峽山寺 | dsc_8529 & 8531 |
| 66. 與陳去病蔡公時朱念慈葉紉閣同飯一景樓望海珠月上有作 | dsc_8531 |
| 67. 鄉居 | dsc_8531 & 8533 |
| 68. 壬戌元旦即事并預祝母馮太夫人壽 | dsc_8533 |

*所有照片檔案編號原有後綴“_pe”（如 dsc_8533_pe）均在詩目中畧去。

在清集（簿本記號 4）

照片共 32 幅（編號：dsc_8465_pe 起，dsc_8533_pe 終。）

照片檔案編號：dsc_8465_pe（封面）

在清集 壬戌春日 民國十年至十一年初稿

照片檔案編號：dsc_8467_pe

夜宿曲江船与胡章民蕭越生夜酌感事

東河燈火照西河。兵馬皇皇夜枕戈。入蜀關張原猛將。渡江劉祖且高歌。風寒嶺上雲初合。月冷湓陽水不波。努力中原末日事。五湖遊興近如何。。

粵局方允許汝為將軍赴上海部將張國楨關國雄謝文炳同駐韶關

照片檔案編號：dsc_8467_pe & 8469_pe

訪風度樓舊址

怪無學術紀商山。何似曲江宰輔班。為有千秋金鑑在。政家風度費追攀。。

嶺北文風到海南。煩公親手鑿叢蠶。可憐唐宋多遷客。偏說名區住不堪。。

照片檔案編號：dsc_8469_pe

訪軍中諸友

縞紵多交見凱旋。西歸更喜着先鞭。戟門把酒無寒意。花縣鳴琴有雅絃。興廢一言關大計。治安多賴慰氓塵。飛書何足枚臬算。城闕青衿恐費詮。。

雷維森知南雄縣事江經華知曲江縣事余主第二軍秘書事

偕許齡筠訪公武私邸

小山叢桂素心期。獨抱松筠雪後知。崇雅風流疑頓盡。勝飲醇言白玉卮。。

風華盖代想烏衣。滿路人尋芳与菲。天外歸鴻今再見。壁間綠綺為誰揮。。
公武出近人搨廊露古琴條懸壁間

照片檔案編號：dsc_8469_pe & 8471_pe

許將軍自滬返部選廣州辦公常得省視老母稍盡子職

慈母虛生孤露兒。兒以孤露輕別離。少小弄翰驚長老。弱冠便尔為人師。道
衰慷慨慕游客。海內豪傑交相知。義不帝秦魯男子。身嬰黨錮甘囚羈。母憶
兒兮血繼淚。兒念母兮烏啼悲。亾歸田園半典賣。親故非笑母怡怡。勗我借
陰運甓事。逮奉鷄豚又一時。五年瓊海与居庸。雪末柳往南北馳。虞翻骨相
非貧賤。恥為簿尉供捶笞。報壇抗手風雷動。幕府長揖羽檄麾。已歎無功掛
黨籍。鼎革而後泣路歧。空寫龍圖元元論。愴怳東山滔滔詩。今當走馬隨大
旆。真如飛鳥依故枝。乞取閒曹歸事母。白雲鄉樹長蔽虧。。

宋張去華獻元元論真宗命以縑素寫其論為十八軸置龍圖閣之四壁

照片檔案編號：dsc_8471_pe

林公任自汕耒薦任軍部書記

百粵旌旗照海新。文章浩蕩動星辰。雄鳴未許人鼾睡。鱗逆曾驚我欠伸。首
就功名非素志。憑將肝膽見天真。登樓且莫談王粲。風月依然一榻陳。。

公任曾從余共事汕頭民甦報社

贈吳枚臣

羊公戎幕賞風流。詩句狂耒碑碣收。座上少年漫推許。胸中各自有千秋。。

照片檔案編號：dsc_8471_pe & 8473_pe

謝盧大令家駒惠贈翁源石鷹

詞報瓊琚坡老句。拜將冠服米顛儀。飛騰時作出塵想。嶺北無山石不奇。。
已寫長句用坡老韻報之偶然對石發奇想再成此絕句

山中石古木亦古。勿用雕琢存其天。恐被精禽填海去。花南硯北日周旋。。
見贈石鷹配有木根一座勢亦盤屈有致

照片檔案編號：dsc_8473_pe

世變

西方有聖人。其名曰甘地。東遊耒上庠。血淚成文字。禦侮不合作。明心大悲智。巴黎和會終。福音播天使。宣言十四條。威爾遜倡議。國社破空傳。共產起攘臂。虎餓視眈眈。鷹揚飢覓飼。歐美戢干戈。束牲載書記。攘奪無已時。侈謂縮軍備。世變極紛紜。人道安所寄。吾華多難興。皖直相携貳。歐戰亘四年。寢兵尚一致。而我九年中。羣盜猶內熨。斯民咸怨咨。虐之益顛頽。何以致太平。獲醜移郊遂。幸覩黃河清。建國縈夢寐。。

民九年世界大事記賦以觀世變也

照片檔案編號：dsc_8473_pe & 8475_pe

重見王萊庭

天山匹馬昔年回。兩度昆明起劫灰。為惜羽儀嚴擇木。較量升斗與論才。壯遊共攬澄清轡。快意未親祝捷杯。神物自知終有合。霜鋒紫氣匣中開。。

王子自伊犁入都方與謀西北生產發展替軍團叛先後南歸曾任韶講武堂教職以暇赴石井兵工廠考求兵器學粵軍返旆許將軍特延至幕中備諮謀復得攻錯之益

照片檔案編號：dsc_8475_pe

林毅強自雲南返羊石以普洱茶爨寶子碑拓本見貽賦謝

自君南之滇。金臺贈君詩。喜從軍校返。餽我茶與碑。我生有二癖。飲茗及臨池。滇中大小爨。寶子正而奇。晉書尚蘭亭。適口嘗習之。其如剛木我。

遺世歲寒姿。豈不窺漢魏。惟此為吾師。亦有盧仝好。普洱胃所宜。古味皆盎然。春風動鬚眉。有茶詩更清。有筆走蛟螭。平生嗜書如拓地。橫挾衆體之藩籬。厥味醺醺若茹茶。此中甘苦惟自知。方中矩。圓中規。學之道在斯。桓桓武士橫刀槊。摩崖待勒燕然辭。。

照片檔案編號：dsc_8475_pe & 8477_pe

感暮

搗殘臘鼓又迎春。百劫猶存孤露身。稠疊海桑隻眼冷。珠璣怵煞買花人。。
倦飛且擇故巢林。重見難消風雪心。廿四番花彈指訊。梅開數點伴清吟。。
細檢征衣惜別離。柳邊雙燕拂柔絲。空橫草檄如椽筆。悔不當時學畫眉。。
人天無據佛空談。絮果蘭因費討探。乘興登樓呼酒去。惱人春色是江南。。
憐遇愛才心上語。回嗔索笑夢中癡。相看不厭春顏色。霜後黃花插硯池。。

照片檔案編號：dsc_8477_pe & 8480_pe

女冠子

庚申孟秋自軍中歸与梅瑩尋白雲龍谷黃花岡諸勝吾粵底乏偶与梅瑩談及前遊偶驅車再往索為長短句人之以為賞心樂事者而余獨增歲沕惆悵因賦惆悵詞不解音律如我聊學倚聲耳

惆悵惆悵，天上人間無兩。會應難，莫遣彌天恨，空拋此夕歡。自言耕織好，訴說夢魂安。年年兒女樂、樂團樂。

惆悵惆悵，爾我深情一樣。甚牢愁，玉漏消殘夜，銀河落素秋。問花花解語，望月月西流。隔江同入夢、夢從頭。

惆悵惆悵，道是感恩無量。卻羞郎，珍重山林約，縈迴鐵石腸。香燒心字

細，絨唾口脂香。没人知此意、意難忘。

惆悵惆悵，瀛海笙歌繚亮。晚風涼，芳草嘶金勒。黃花寄玉璫。凌波情思遠，籠袖漏聲長。怪儂千萬恨，恨詩狂。

照片檔案編號：dsc_8480_pe

偕越生章民飲陸羽居

日暮西風迫路林。引杯欲語轉沉吟。故山猿鶴知多少。亂世英雄自古今。著作枉將燔閣去。聰明拙向補牢尋。生平第一流人想。誰解中郎爨尾琴。。

張星羽部底乏粵北後即率部引去不願與別部爭地盤時越生章民共佐張軍謀皆讀書自好之軍人也與余交深頗相推許嘗列舉所制保乏軍官生之優秀粵籍者請許將軍引用以求整軍經武共事中原耳

張星羽辭旅長職銜許將軍命往慰留時方有事粵西張復請事乏後乞罷免

已共功名非數奇。不堪髀肉復生時。五湖容去同安樂。一旅中興乏指麾。言念斧斤行役苦。更歌雪柳整居遲。惜陰運甓前賢事。佇見西征羽檄馳。。

星羽號所居曰甓廬

題許佛航蕭越生與余合照像

入世閱瀾淪。粉社百雲親。閉門非易事。握手共歸人。未換風塵色。能傳阿堵神。歲寒期與守。奚用畫麒麟。。

照片檔案編號：dsc_8481_pe

殘臘還鄉

北郊家在望。晡靄入林皋。羽急穿新燕。裘披戀舊羔。齊簷堆晚稼。點陌破山桃。年貨前墟趁。親歡餞臘醪。。

佳節客中多。殘年忽忽過。一家如逆旅。四海正干戈。紅紫翻新景。鷄豚樂太和。假期無幾日。林下得婆娑。。

壯歲萬里行。團圓鵲啁聲。慰親非顯秩。養志愧虛名。父老時過飲。鄉間乍解兵。縑緇尋蠹草。詩祭不勝情。。

辛酉元旦

去年霞城戍。今開仙城春。仙霞嶺亘八閩峻。五仙觀古連城闔。仙桃十萬八千歲。願薦辛盤一嘗新。父老望還旆。百粵銷兵塵。鋤耨荊棘叢。淮南壁壘親。北收大庾嶺。南靖琼海濱。元勛邁固宿。芳躅踵黃花。龍溪長水仙。今耒主吾家。珠江何漣漪。賓主歡歲華。。

照片檔案編號：dsc_8481_pe & 8483_pe

東園追悼陣亡將士感挽

白衣冠去弔東園。空巷人耒車馬煩。挽自田橫惟壯士。痛如杜老泣王孫。蠻夷大長降能受。豎子成名轍又翻。淚盡黃花岡上血。不堪全局問中原。。

代許汝為將軍擬聯云：「黃花已謝綠草又生慷慨捐軀光百粵戰骨易收忠魂難慰淒涼駐馬問中原」。識者早已知粵局前途為可憂矣

照片檔案編號：dsc_8483_pe

梅瑩赴花埭貧民教養院參觀余因事後至歸舟感賦

去耒鷗侶自西東。野渡波迴夕照紅。初霽雲霞明海曙。向榮草木拂春風。萬花成市生涯好。一葉橫江烟雨通。教養可籌真國計。朱門奕奕此心同。。

照片檔案編號：dsc_8483_pe & 8485_pe

幕府

庾子歌窮愁。仲宣莫登樓。書生多從軍。昌黎入蔡州。卧龍起南陽。辛苦為
筆籌。當建伊吕功。漢賊迥不侔。嗟我遭喪亂。衣冠淪九幽。京邑煽羣盜。
擁兵各跨州。護法亦倡言。晦鳴驚時流。燒書投秦火。跋扈汕江頭。我行殊
未已。擇木尚夷猶。憫彼新亭泣。挾策汀漳遊。勢欲連閩浙。百粵賦同仇。
豈其隳中道。有若盾與矛。衆訾所見迂。觀變人鬼謀。歸來自隗始。巖穴廣
搜求。吾黨許將軍。忠蓋媲武侯。再拜進嘉言。幕府英俊收。思併中原力。
羣策頌其休。繞朝語非誑。無人實秦羞。澤灌毋相尤。賈傳胡自囚。堂堂張
子房。所貴魚水投。馬枚何足算。多士想西周。。

照片檔案編號：dsc_8485_pe

与梅瑩夜泛東流聽笙歌聲滿東堤上下相與感歎

精妍士馬念西歸。又逐笙歌舞錦衣。載酒月明魚欲出。穿舟花底鳥忘機。一
江春水無愁思。萬里浮雲自捲飛。燈火珠隄看不夜。乘風迴棹尚依依。。

懷伍少裴

慷慨論交復遠違。勞生身似陷重圍。每傾江上澆胸酒。能奏花間爨尾徽。豈
獨數奇惟李廣。却愁道阻想元暉。東山吟罷歸何晚。特地謠思月滿衣。。

照片檔案編號：dsc_8485_pe & 8487_pe

珠江重晤陳去病共酌南園

越石良才感恨多。仲宣羈旅滯哀歌。雍容議席從羣彥。逸響丁丁柯伐柯。。

珠江流似汕江流。山水曲江尚憶不。且飲抗風軒裏酒。南園春色接花洲。。

卓卓驂騑逝欲前。才如江海盡南遷。獨撐半壁舒長轡。北望燕雲水拍天。。

照片檔案編號：dsc_8487_pe

遊北園擬劉楨雜詩一首為梅瑩進酒

簿書得餘晷。散策涉春郊。日昃不遑食。沽飲竹裏庖。北園麗風物。灼灼桃花梢。開簾見雙燕。返哺思故巢。猿鶴睨其旁。勿此征塵嘲。豈無繞木禽。當窗鳴交交。久別難為懽。朝喜聽凱鏜。坐對素心人。形影漆与膠。白雲多翠微。何時歸結茅。。

馮軼裴南歸喜余軍幕尤深切磋之契

建國知無過整軍。眼中噲等尚紛紛。河汾門下人才盛。拔識應空冀北羣。。
保芝軍校与陸大人才輩出借用河汾典唐代房杜李魏皆王通弟子吾粵將材得蔣百里先生薰陶之力甚大為黨國棟梁至為殷盼亦常以此為言

科學戰爭人道苦。南陽功業小心成。曾將項羽嬰兒弄。博得留侯儒者名。。

照片檔案編號：dsc_8487_pe & 8490_pe

赴港視許將軍疾乘火車歸途湧作

逐客重來風景非。江山淪落尚依依。閉門胡帝終無策。幾見連城抱璞歸。。

腐儒空口說尊攘。海上風狂鴉片香。獨恨射鷹圖未見。虎門日夜水湯湯。。

轆轤向晚捻昏黃。野老辛勤耕海疆。九龍去後石龍出。隱約雲山是故鄉。。

大局安危百戰身。北門鎖鑰繫斯人。馳驅已許行何畏。前席曾聞詔語親。。
許將軍疾作中山先生常臨視私邸一日就病榻商北伐憤而言曰「陳競存不出兵我們當整軍西行毋再猶豫以誤大局」許將軍唯唯奉命余方侍軍書 先生大無畏精神余得有深刻印象時仲元先生左右調護之力甚巨北伐議遂決之

照片檔案編號：dsc_8490_pe

赴港報告部務許將軍以清遠縣知事馬某不洽輿情擬辟余承乏且曰已電李

君子寬未接管秘書處事務余婉謝之時軍部各處文案多集中秘書室北伐
大計已定不願遽離也賦此自解

亂後方圖治。亦知馬上難。歸來原慕義。疎闊不宜官。願賦戎車出。遑求衽
席安。折腰非易事。且讓客彈冠。。

照片檔案編號：dsc_8490_pe & 8492_pe

星期日携梅瑩遊黃花岡

紅花岡畔路。携手弔黃花。黨責千鈞負。偏安一着差。晚風吹宿草。馳道湧
河沙。新勒貞珉字。經時碧血窪。。

照片檔案編號：dsc_8492_pe

為吳木蘭女士書扇面即呈葉大

珠海春花地。相逢去忽忽。未餐胡虜肉。重語女兒紅。風雪朱顏改。江湖浪
迹中。索書妍媚少。刀槊怪橫空。

從軍十年事。巾幗膽輪囷。戰後江南夢。花時嶺上春。浮雲無盡態。明月有
伊人。倘遂封侯願。凌烟粉黛新。。

照片檔案編號：dsc_8492_pe & 8494_pe

鄧仲元先生為語我以委知清遠縣事赴港復於許將軍前極陳吏治整飭尚非
其時且無積資謬膺縣寄更非所宜為言許將軍謂暫無適當人接篆子寬即
到可即赴任余辭不獲乃返省部署親知紛未慰問平空又增方寸俶擾賦此
三首以明志

曾讀亭林縣令篇。圖龍閣寫論元元。由來名器輕廝養。幾見文官不要錢。桑
土未謀仍破屋。春霖便出正荒年。區區百里才非易。夢想龔黃佐漢宣。。

高翔毛羽惜翩翩。枉筮茅茹一拔連。始願計窮填海石。大風吹出在山泉。折腰斗米曾何補。曳尾泥塗更可憐。居者為籌征調苦。轉饗須備峽中船。。

(龍夢凝按：此詩題曰三首，惟手稿僅錄此二首)

照片檔案編號：dsc_8494_pe

辛酉春社与諸父老鄉飲

為國頻年患難嘗。事關出處費商量。縣臨山水官非俗。社飲粉榆禮在鄉。衆已畫墁忘食志。我慙捧檄策循良。能興孝友資觀感。但祝先疇樂歲穰。。

嗟予小子事功名。束髮零丁萬里征。負米多時虧俯仰。絕裾當日太縱橫。不辭杯酒留春在。試領銅符拜母行。治國有才如宰肉。侯封何敢望陳平。。

照片檔案編號：dsc_8494_pe & 8496_pe

李勵瑩陳筱雅李伯璋李榦宸葉筱花劉達衡諸友同赴任車抵潛江乘船至清遠縣城過飛來峽賦詩示從者

銀盞坳前鼓角迎。麓村爆竹繞車旌。碧琉璃水飛來峽。人似天邊飛到時。。

自昔選人苦瘴邊。每經中宿共流連。鄉民夾岸看吾過。爭道新官是少年。。

載舟覆舟水鑑明。泉在山清流更清。母訓持循心似水。未須封鮓博賢聲。。

百粵名區西北衝。得佳山水勝花封。兵災過後戎於莽。撫字無如不害農。。

大邑援琴試一彈。知音強半改絃難。漢興黃老原多術。桑雉能馴賦伐檀。。

照片檔案編號：dsc_8496_pe

王榮庭羅約經來遊

峽中鷄犬異桃源。却掃衙齋近水村。才報下車良友至。烹茶煮筍話寒暄。。

戰後蕭條閭井虛。十年糶政革糧胥。易從飢渴生民信。賢牧何人不讀書。。

王羅皆軍人而好學深思之士與余交好遠道見訪與王君談縣政興革事甚詳各縣糧司承前清遺習把持舞弊縣官往往因緣為私有所憚而不敢加以糾繩余訪求得縣糧冊後條列整頓糧司以罷工要挾立斥革之從新組織並規定征收報解手續民心大快

照片檔案編號：dsc_8496_pe & 8497_pe

清明日植樹飛耒峰

植樹飛耒峰。意謂興麓林。北江饒木材。清遠多高岑。久廢虞人職。伐木懷好音。我初履此土。忽逢佳節臨。苗圃地未闢。樹苗將何尋。大府頒嚴令。下吏其往欽。衆謂飛耒峰。矗立江水潯。邑乘號名勝。風景殊幽深。爰命各界役。同舟艤山陰。庠生携遠鍤。嘉賓耒盍簪。寺僧蹣跚至。野老出盤歛。人各植一株。春風拂我襟。吏告典禮成。相戒樵牧侵。造林誠要政。墾殖重古今。樹人與樹木。經始儆予心。。

照片檔案編號：dsc_8497_pe & 8499_pe

濱江械鬪和息紳民餽送頌言書錦箋八幅紀此案始末余受之意有未釋賦以自訟

官清民不爭。勤民鬪不起。說詩戒鼠牙。其禍本小矣。積而為怨戾。往愬如充耳。憤極思一逞。害且數十里。閭井同寇讎。拔刀向桑梓。官府因為利。甚或淫威使。濱江陽山間。風化梗邊鄙。檄衆董之威。纓冠喻以理。內先懲奸胥。外則嚴鞭弭。愷弟導祥和。開誠判臧否。鄉鄰返敦睦。父母實孔邇。守道公生明。安用斗衡毀。誰不愛田園。誰不顧生死。履霜堅冰至。慎勿忽於始。敬天而勤民。民皆吾赤子。區區此鬪案。求治亦若是。。

濱江鬪案禍連數十里余接事後立檄調防軍許濟部馳往彈壓其時孫本戎部駐縣城官兵多外省人恐其言語隔閡易生誤會且濱江許部距濱江較近兵貴神速而彈壓械鬪更不容稍緩不料有以不調孫部造謠謂有他意此外人以為械鬪案為有利可圖耳旬日間即由雙方調解和好如初造謠者亦釋然地方幸免殺戮曾派員往勘以具報顛倒事實立予懲革先杜絕賄托示以大公感而和解案遂了結

照片檔案編號：dsc_8499_pe

巡視太平市山塘紀事

北江支流太平市。水勢湧衍趨山塘。上游惡堤阻交通。下游畏鄰壑其鄉。各有利害構訟久。山塘之堤豈不祥。數十萬戶賴保障。田舍幸免昏墊傷。嘉道至今爭未已。縣宰一易民徬徨。況有懷金奉奸桀。築隄毀隄論張皇。貪者偶為左右袒。勸耰立起鬪兇鋌。誰無禹稷飢溺志。當思仁者如姪昌。官卑慄此民命託。乃携工師相陰陽。咨汝民衆善圖究。事關水利宜端詳。勸之勿爭務友助。謀建水閘資翕張。費取諸民十之三。餘貸官府為發棠。大府治河共厥責。吾言可用莫苞桑。。

照片檔案編號：dsc_8499_pe & 8502_pe

尊學

我思鄭鄉校。子產惠之存。我思朱泚子。舍地建學尊。縣教方待振。育才植其根。區區一訟庭。奪校復何言。司法与行政。豈不有公門。新進自堂皇。多士紛譁喧。上官赫然怒。為學保籬樊。抑抑仰威儀。菁莪春風溫。。

縣新設法庭實行司法獨立主事者以縣署地方湫隘據縣立小學校為庭址勸止無效事聞省院檄令遷入縣署辦公縣學界為懸扁額於縣堂以澤被菁莪四字并跋後始末稱余維持教育之力事等自擾政府尊嚴已損至可惜矣

照片檔案編號：dsc_8502_pe

除害

興利期三年。除害要一旦。与其利未興。坐待河清晏。曷若害先除。當機宜立斷。吾粵鴉片役。首蒙侵掠難。其次曰賭博。流毒徧閭閻。如此稗政何。屢禁有所憚。藉口籌餉糈。奸黠侵漁半。公帑非正供。衣冠坐塗炭。今逢政革新。禁令頒在案。可耐防軍窮。刁斗空宵旰。甲以賭為糧。乙以烟為爨。雖難左右袒。終究利害判。欲善本同情。至誠無格扞。長官欣諾言。父老相讚歎。空巷夜提燈。光明星斗燦。耒祝除害功。与民更始看。。

第二軍撤回禁烟專員蔡鶴朋福軍統領袁德墀下令駐縣所部將番攤禁止徇民衆之請求全縣烟賭禁絕而余奔走調護幸得上下誠信相孚非革命軍人不易蕩滌瑕穢也

照片檔案編號：dsc_8502_pe & 8504_pe

國會非常會議議決中華民國政府組織大綱舉 中山先生為大總統五月五日就職電呈敬賀奉 賜電勗以[盼我同志共任艱難]拜讀之餘弥深感勉賦詩一首

龍蟠虎踞話金陵。回首神州感不勝。鼎革十年艱締造。府開百粵肇中興。黃花壯烈旌旗擁。旭日祥凝劍氣升。帶礪同盟重建國。祚延民統五雲蒸。。

照片檔案編號：dsc_8504_pe

梅瑩遠來視余戲作

官齋鵲啁早知晨。渡口舟回問訊頻。彭澤未歸三徑好。遠來今見白衣人。。

百里方羈簿領勞。於陵未似古人高。問民疾苦慙無補。怪我風流不種桃。。
梅瑩內子時穿白衣裳

署園白玉蘭高蔭參天大風摧倒梅瑩坐玉蘭樹攝影

崇柯映碧漪。玉蘭香滿枝。嘉植逾百年。無端妒風姨。一挺參天秀。一卧紛離披。荒園茅亦誅。草木自葳蕤。拂拂涉遊趣。綠陰障炎曦。晏坐樹中影。攀條生妙姿。落英拾盈掬。榴花如火時。涼颼飄白紵。清響未黃鸝。感此後樂心。花開却為誰。何用判榮枯。真賞慕天隨。。

照片檔案編號：dsc_8504_pe & 8505_pe

鄉人將母命來問訊

少年湖海客。夢裏宰官身。孝治遲迎養。慈懷遣使巡。忘憂長護草。在抱勵

松筠。陟岵鄉雲遠。桑麻若比鄰。。

母居白雲山之西到縣治朝發夕至

門祚嗟衰薄。孤零嬌養中。哦詩方解語。問字課澄衷。樽酒朋交廣。機聲夢寐通。報親如報國。恩重戴山同。。

照片檔案編號：dsc_8505_pe & 8507_pe

偕梅瑩遊太和洞

縣有佳山水。莫似洞深美。民族尚樸僊。武健未可訾。濱江自北來。下車冠嶢嶻。治本崇太和。桃源非虛擬。桑雉以道馴。胡為賦勞止。今遊太和洞。出郊按閭里。觀稼秋雲黃。豐穰竊自喜。風日晴霽開。林巒變蒼紫。妻方遠視余。相從路輪委。洞裏飛瀑鳴。千巖獻奇詭。過者多題名。在清庶知旨。水舂運機軸。老農亦呈技。洞口石蹲伏。森若行伍峙。傳是黃巢兵。叱之羊不起。幽溪附神蹟。世遠競稗史。息蔭煮新茶。歡酌漱流齒。。

接任時濱江鬪案方起調解釋爭余以民國後農村舊組織已壞縣令無資可循械鬪之風盛而貪墨者因以為利桑梓仇讐愈甚黨錮之禍及於窮檐余矢以保合太和為圖治之本案結濱江居民贈以文紀其事遊斯洞後立書[在清]兩壁窠大字鐫洞巖中自勵並示遊者內子梅瑩口曰是真在清遠書紀念也

照片檔案編號：dsc_8507_pe

援桂之役我軍克梧州陽山匪蠢動圖為沈鴻英內應鄧仲元師長派參謀長陳可鈺到縣商防務余已檄調民團佈防濱江得關國雄張國楨兩旅長舖門捷報第一師所部進駐連江口一帶陽江匪黨被擊散夜巡返署燈下感賦

北門鎖鑰綰陽清。粉社都知曲逆名。喜聽蒼梧銷梗化。真如大漠振天聲。鄰封已靖方張寇。杯酒尤深舊日盟。公路公園吾未暇。愧完征繕事農耕。。

照片檔案編號：dsc_8507_pe & 8511_pe

王棻庭出宰賀縣遣賢阮傑榮末告詩以寄贈

天山伊水走縱橫。此日參軍杖策行。胸發劍鋌堅可破。手收銅印亂方平。李
愷地利知能盡。博望功名許抗衡。百里未應羈素志。轅駒空作識塗鳴。。

之官三日喜君臨。君昔長征眷好音。儘有金臺容展驥。不妨山縣一鳴琴。茅
茹其彙同人吉。霖雨蒼生四海心。為借楚材屬知己。東西勞燕費招尋。。

幕友李勵瑩陳筱雅王子欲招致西行以未得相當替人遂止

照片檔案編號：dsc_8511_pe

登峽山寺示梅瑩

時抱危途叱馭心。一麾山水再登臨。飛來峰似西湖景。蘇子南遷湧苦吟。。

猿含環去鳥空枝。古寺臨江遠席移。班草為貪丘壑美。山樵採得紫天葵。。

回抱層層峽嶺寬。清明植樹到秋看。十年大計從今始。祇惜虞人未設官。。

夜泛酒船与梅瑩觀月

從事不辭腰折早。清遊且喚酒船新。悠悠江月明中宿。多少風流嶺外人。。

得歸還許開三徑。放棹終須厭五湖。憂樂与人兵未解。散官徒悵似囚拘。。

藏霞洞

艤舟藏霞洞。身藏萬木中。山行盤石磴。雲卧唱松風。濯足清涼處。何心金
碧工。不逢麥道士。三教說冬烘。。

麥道士游港澳間斂財甚多洞中建築宏麗倡三教同原之說修道男女十餘人同居洞中邑
人言自我履任後麥道士久不聞矣如此偽道士所修何道其頭腦寔一冬烘耳余与梅瑩濯
足而去

照片檔案編號：dsc_8513_pe

梅瑩未遊數日即去

我家如逆旅。官舍亦非家。戎馬十年夢。風雲一路賒。可携茶笋美。歸去峽山斜。尚缺板輿養。酬恩感靡涯。。

遊興知未闌。新秋別易寒。鳴絃殊賞雅。酌水薄為官。野蔌猶家味。嘉魚勝客餐。故將兒女態。天下一家看。。

馬君武出長桂政函聘省署諮議述懷

太息邕江以武鳴。單車入桂寄壽城。故人旁及芻蕘采。出宰方慙山水清。文治教條成俗美。農工政策望風行。丙辰讜議高京國。鬣奮龍門路幾程。。

照片檔案編號：dsc_8513_pe & 8516_pe

署園靜坐

負手玉蘭花下立。晚來爽籟香習習。立久且坐掃石苔。顧眄綠天快呼吸。涉園靜處忘憂樂。四境戰後告寧輯。上下郭中聞市聲。頗招薄宦求治急。東坡安石嶺南選。能詩能佛流光熠。此行峽山訪舊題。陡憶天涯圖屨笠。挺生名世變法強。熙寧相業嗟何及。韶石髫齡不可追。罷去秣陵戀一邑。即隨田父歌元豐。禪悟甘蔞寒山拾。。

照片檔案編號：dsc_8516_pe

重陽望葦架山

霜晨郭外半天霞。高會龍山有孟嘉。似帽一官吹易落。何如奉母醉黃花。。

長寄漂零孤露身。簪萸兄弟更無人。秋風葦架山前立。愁與遊蹤取次新。。

求治

求治始於鄉。自治今在縣。鄉制尚乖離。縣治基未奠。周代鄉官重。遞及明清賤。鄉治得其人。保甲成組織。選舉按級施。名器公而徧。粵縣九十四。富庶天府擅。維時方用兵。守令多才彥。雖無漢威儀。寔辟軍曹掾。迺聞新政行。時雍樂丕變。檄民選其長。草野耳目眩。何地無忠信。側陋明揚宴。頗具偃武心。僉曰分治善。民權此椎輪。官治導之便。監督持節出。競選分路線。既膺簽發榮。不嫌孫山殿。富貴歸錦堂。里黨彈冠羨。幸免考試勞。專城正南面。且待瓜代期。三年效自見。。

照片檔案編號：dsc_8516_pe & 8521_pe

應關伍兩法官酒船招飲

簫鼓坐兩頭。風絃共一舟。枕流中宿夜。清醕晚未秋。天宇推篷迥。鄉音喚渡柔。青衫年少宰。無語悵江州。。

客已半醒醉。詩應屬使君。柳邊船載酒。郭外月流雲。縣小誰為主。民安不駐軍。排衙歸路近。北雁數聲聞。。

照片檔案編號：dsc_8521_pe

送葉少花入桂并托致書星羽章民越生諸同志

葉六從我山縣遊。枉學刀筆志封侯。桂林山水聞未久。襁被欲往試身手。我軍方報乏蒼梧。中有健者張蕭胡。端人取友友必端。要附青雲跨紫鸞。君家兄弟敬交早。末此大好去亦好。余心豈為功名熱。達非盡智窮非拙。聖歎滔滔惜逝川。異日相逢亦偶然。。

寄懷蕭越生蒼梧

學書學劍少年成。易水歌還語鐵城。早以文章交莫逆。更從患難賦嚶鳴。關山入夢征蹄遠。壁壘如巢燕眼清。倘遇賀江王大令。瓜期可及又長征。。

照片檔案編號：dsc_8521_pe & 8522_pe

胡章民自梧州軍次回云將遠行同遊先施天台留一夕談即事

負德辜恩語子卿。弓蛇杯酒欠分明。何曾見敗乃公事。却又未成豎子名。遺憾受降城未築。一朝縱敵寇方橫。懷忠怪尔抽身去。珠海狂流夜有聲。。

胡子於援桂時即建投降沈雄英之議并身任幹旋陳炯明原甚嘉納我張關兩旅進迫賀江
胡亦策劃軍事擊退沈部於舖門竟以疑忌出走胡固無罪也

照片檔案編號：dsc_8522_pe

聞伍少裴在桂以嫌疑被繫往繆澤邨古湘勤處訪問消息廝中陡生根觸數奇如伍子者曷勝浩歎

我心如胥濤。亘古起伏時。勇邁過李廣。所往歎數奇。丈夫事天下。無與鄉里兒。論交戎馬間。唯子獨權奇。閩詔遭蹉跎。相見不我期。東征兵方解。西討師又移。幸抱卞璧返。聞子間道馳。鴻飛落矰繳。驥足困藩籬。官祿寔天械。高明招鬼窺。孫龐阨正甚。廉藺今其誰。若挾睚眦報。深為養士悲。生還在之命。人孰能死之。殺士系人望。守道復何疑。。

照片檔案編號：dsc_8522_pe & 8524_pe

與客小飲官齋聞捷

討袁桂系主粵政。援桂粵軍承天庥。一局乘除覘國運。兩家休戚貴人謀。偏安羞說蠻夷長。息壤應封關外侯。南北秀才誰傑出。戰雲方罩岳陽樓。。

吳佩孚時援鄂陷岳州

照片檔案編號：dsc_8524_pe

平民圖書館成立贈館長黃伯言

道本湯銘德日新。山中草昧有經綸。揭陽趙德當時重。豈待昌黎始教人。。

文光父老說科名。何地傳書得二丁。絃誦未忘朱牀子。普施平教樹鄉型。。

照片檔案編號：dsc_8524_pe & 8527_pe

警政

民團本自衛。強使保郊闡。又檄改辦警。嚴令戒因循。團警如並舉。瘠土奈賦貧。毋已求之漸。縣制須更新。警官發縣用。索委日頻頻。勵精謀鼎革。綱紀費經綸。其上如羝羊。羸角感苦辛。其下如豮豕。大畜以柔馴。邊鄙理莫喻。梗化出豪紳。抗警藉保團。罔恤令五申。董威風雷動。衆口詈不仁。芸芸駭圖始。曲突復徙薪。誰曰烹鮮易。此舉逾千鈞。法行乃知恩。務在信立民。。

勵行警政勢在廢團三坑派出所甫組成土紳何某竟糾衆奪去警械謂民團所有槍枝原屬民有不惜破壞警政乃捕治之卒令其悔過書釋出人民難與圖始而團警亦有相互為用以謀保衛者何某雖違法惟有導之以誠而已

照片檔案編號：dsc_8527_pe

各界歡送會感賦別邑民

漢吏盛賢才。賢才養可述。考績隆三載。京兆誠五日。亭林痛陳之。荊公言事悉。時維粵政新。縣長民選畢。大府嚴甄陶。冰銜乞甲乙。我本更始末。殫勤愧刀筆。今去及瓜期。朽馭矢慄慄。青年綰銅符。愧百不舉一。殷殷扳轅思。愛比家人暱。惟匪與驕兵。夙知民所嫉。烟賭徧鄉閭。其害心同怵。除害湏務盡。力行過粗實。糧弊仍房科。斥彼蛇鼠獠。先儒建學風。保育庶勿失。但求官民親。同人于野吉。民得與官親。太和氣洋溢。持此互慰安。載歌載舞無逸。。

民選縣長陳守仁到縣接事邑中各界開大會歡送我行余初知縣事即墨守保合太和之旨以求合乎治道所謂勤政愛民亦求實現太和氣象之一種方術耳吾不敢卑管晏苟語乎道則五霸羞稱矣世運之變雖聖賢亦無可如何

照片檔案編號：dsc_8527_pe & 8529_pe

赴邑紳餞別酒船

草木向春榮。嚴冬轉太清。未漓熙肅性。偏有別離情。往事歡魚水。浮生寄鹿茸。一船遙夜飲。誰此送韶諠。。

對客苦思吟。悠悠行道心。鳴絃山水際。鼓枻水雲陰。唯善真吾寶。民情不換金。重耒太和洞。飛瀑試題襟。。

照片檔案編號：dsc_8529_pe & 8531_pe

歸船過峽山寺

峽山未去尚青春。唯有東坡詩境真。欲訪仙猿樵不識。半肩黃葉與僧鄰。。

聰明誰似小船娃。為送清官煮舊茶。欸乃聲中同出峽。潯江爆竹響晨車。。

去官惘惘似離家。無恙桑麻夾道遮。斗米孰如三徑樂。白雲山下傲霜花。。

銀漢迢迢回望賒。小休民力考成差。地原扼塞閩兵要。嶺上風寒到海涯。。

計闢銀盞坳公路以軍事故遷延未辦交通生產各建設要項深滋愧矣

短短水程又陸程。歸時差喜一身輕。岫雲舒卷都隨意。向晚荆扉母笑迎。。

樹木猶留芡憩情。風塵少日感餘生。故鄉不少北江客。能說君侯舊姓名。。

照片檔案編號：dsc_8531_pe

與陳去病蔡公時朱念慈葉紉閣同飯一景樓望海珠月上有作

少留野趣橫州渚。好景無如一景多。江上風雲窮變滅。嶺南文酒得婆娑。我歸羊石猶然客。世有龍門任便過。會向隱之泉共飲。豐湖莫艷說東坡。。

攬轡因嗟水亂流。又聞戎服急同舟。未應高閣人才束。一為西陲將略籌。元亮去官還借酒。仲宣游幕愛登樓。南社南園非異趣。望中青眼滿良儔。。

照片檔案編號：dsc_8531_pe & 8533_pe

鄉居

年豐依傍祀之堂。志食何如田舍郎。萬里路行官百里。歸未更喜母康強。。

四起鄰舂我曝書。日呼童稚鬧庭除。不辭鷄黍尋常宴。甘薦園中雪後蔬。。

篝燈對榻語桑麻。豐歉逋租較歲差。焚券仰承慈惠意。尚無舉火待臣家。。

移家故里十春秋。屢費先廬桑土謀。母索新詩供笑料。問兒憶對鯉庭不。。

牙牙學語時先太夫人即口授唐句余好吟詠實出母教鄰里佃人欠租或以住屋按揭逾期不還者母一一示知徐補敍負租借者之困苦概置不問鄉人皆能言之此次歸鄰里咸未問訊余亦不辨孰為逋債之人也

照片檔案編號：dsc_8533_pe

壬戌元旦即事并預祝母馮太夫人壽

良辰強半客中過。開歲偷閒膝下歡。鄉人未賀獨子貴。老母大笑陳果盤。謂兒孤苦幸自立。兒體康強母減餐。弱冠失怙倚閭望。海南塞北歸始安。不願花甲祝其壽。不羨板輿迎之官。吾家祚薄雁行單。但願孫子森森長玉蘭。兩婦分祧賢妯娌。家事院事才能完。夾輔麟趾亢宗美。翱翔鳳翽迴仙壇。明詩說禮家有則。介眉春酒非寒酸。。

余兼祧叔祖以德公婦黎奉母家居婦劉時供職公醫醫院醫生兼學校舍監劉尚未有子女黎已生二女四子余母是年六十歲余年十四患疫不死母許願每餐減膳持之終身

(在清集終)